

13 FEB 1999

G15-Hak

MAHATHIR KATA DEFINASI HAK ASASI MANUSIA BERAT SEBELAH

Oleh: Kuah Guan Oo

MONTEGO BAY (Jamaica), 13 Feb (Bernama) -- Perdana Menteri Datuk Seri Dr Mahathir Mohamad berkata definasi hak asasi manusia yang ada sekarang berat sebelah, manakala Perdana Menteri Jamaica, P.J. Patteron berkata hak asasi manusia harus melibatkan sosial, ekonomi dan politik, bagi rakyat dan negara.

Menjawab soalan pada sidang berita bersama pada penutup sidang kemucak G-15 di sini pada hari Jumaat, Dr Mahathir berkata di Malaysia baru-baru ini, rakyat yang menikmati hak asasi telah dinafikan hak mereka untuk mencari pendapatan, berikutan tindakan oleh beberapa orang, yang tinggal di luar negara itu.

"Malangnya, apabila orang bercakap tentang hak asasi manusia, mereka berat sebelah. Kami berpendapat apa yang kami lakukan tidaklah menyalahi hak asasi manusia.

"Tetapi kami percaya, jika anda hendak menangani isu hak asasi manusia secara global, ia seharusnya melibatkan kesemua negara di dunia ini. Ia juga harus melibatkan keganasan, apabila sesetengah negara mengambil tindakan untuk menegakkan dasar mereka, yang menyebabkan rakyat asing terbunuh," katanya.

Dr Mahathir, yang ditanya tentang negara yang dimaksudkannya itu berkata, beliau tidak perlu menamakan negara itu, "Tetapi anda bebas untuk membuat telahan sendiri," katanya sambil disambut dengan tepukan oleh para hadirin.

G-15 mengandungi Argentina, Brazil, Chile, Mexico, Peru, Venezuela, Jamaica, Algeria, Mesir, Kenya, Nigeria, Senegal, Zimbabwe, India, Indonesia, Malaysia dan Sri Lanka, menamantkan sidang kemuncak tiga hari, Jumaat.

Patterson, pengurus perkumpulan itu yang akan tamat tempohnya, berkata kesemua anggota G-15 mematuhi kesemua konvensyen antarabangsa berkaitan hak asasi manusia, bagaimanapun definasi hak asasi manusia harus memasukkan hak asasi berkaitan ekonomi, sosial dan politik, rakyat dan negara.

Beliau berkata G-15 mahukan beberapa aspek hak asasi manusia, harus berada di bawah konvensyen tertentu, sebagai contoh masalah buruh harus berada di bawah Pertubuhan Buruh Antarabangsa dan bukannya Pertubuhan Perdagangan Sedunia.

Menjawab soalan lain, Patterson berkata G-15 tidak berpendapat Tabung Kewangan Antarabangsa pada masa ini sesuai berperanan sebagai pemberi bantuan yang "terakhir", sumber kewangan tabung itu tidak mencukupi untuk memberikan pinjaman, dan formula penyelesaiannya yang seragam, boleh disifatkan sebagai seorang doktor yang memberikan perskripsi yang sama kepada semua jenis penyakit.

Patterson berkata G-15 berpendapat rumusan penyelesaian IMF, seharusnya khusus bagi sesebuah negara tertentu.

Beliau berkata krisis kewangan masih belum selesai, dan beliau merujuk kepada ucapan Dr Mahathir semasa pembukaan sidang berkaitan kesan krisis itu, "Beberapa negara bangun pagi kaya, tetapi miskin pada malam harinya," kata Patterson.

Patterson berkata import dan eksport negara-negara di dunia terjejas oleh krisis itu dan telah mencapai tahap " yang boleh dikatakan sebagai, yang miskin mengidap radang paru-paru dan yang kaya menghadapi risiko jangkitannya."

Beliau berkata G-15 dan negara-negara membangun tidak akan dipedulikan,

jika mereka mengadakan pembaharuan secara bersendirian, tetapi jika bertindak bersama-sama ia mempunyai kapasiti untuk melaksanakan perubahan, "Perubahan mungkin tidak berlaku esok, tetapi ia akan berlaku pada satu hari nanti," katanya.

Patterson berkata apabila institusi Bretton Woods seperti IMF dan Bank Dunia ditubuhkan, beberapa anggota G-15 belum lagi mencapai kemerdekaan, dan mereka tidak berpeluang dalam proses membuat dasar. Oleh yang demikian, mereka harus selalu berbincang untuk merumuskan pendirian bersama bagi membuat pembaharuan terhadap institusi tersebut, katanya.

Sidang kemuncak G-15 dihadiri oleh lapan ketua negara, termasuk Patterson dan Dr Mahathir, yang kemudian berlepas ke Paris untuk mengadakan perbincangan dengan Perdana Menteri Perancis Jacques Chirac.

Dr Mahathir akan singgah di Amman untuk menemui Raja Jordan, dan beliau dijangka tiba di Kuala Lumpur hari Isnin.

-- BERNAMA

KGO RI